

野史蒙略



三

冊數	記號	番號	部類	中學	游賀縣尋常
七	一		史	校藏書	

Z10
91
Vol 4

滋賀縣學堂中  
學藏書印

野史纂略卷之三

明初名古江計勝與水府青山延光伯卿著

承應元年春正月二十五日大將軍嚴有公觀幸

若舞三月十九日佐渡僧蓮花坊與處士辻藤左衛

門等結黨舉兵據小比叡山代官伊丹勝長適在江

戶國中騷擾勝長屬吏岡村傳右衛門帥衆進擊悉

斬之二十一日捷聞至江戸將軍命勝長往搜捕

餘黨令越後長岡城主牧野忠成援之夏五月十五

日賞佐渡吏民有差十六日命出羽守水野忠職帶

刀內藤忠興丹波守松平光重輪番守大坂城各以

予又纂各

三年為期世謂之假城代六月六日有人闖入大坂城與力常直者皆賜死秋八月十一日賜麾下士六百入宅地九月五日修佛事於增上寺以崇源夫人二十七年忌辰也十三日麾下城半左衛門家士長崎刑部左衛門諸伊豆守松平信綱訴曰處士別木莊左衛門林戶右衛門三宅平六藤岡又十郎土岐與左衛門謀不軌將火增上寺信綱問卿何由知之曰僕養子一角即土岐弟也被誘僕為黨僕偽許諾即時來告耳信綱與阿部忠秋等密議夜遣石谷貞清等捕五人土岐逃去十四日執政召四人於評定

所詰問別木曰首謀即石橋源右衛門也源右衛門事美作守水野勝俊執政命勝俊錮石橋十六日土岐自殺於增上寺側十九日執政召石橋別木等於評定所對辯阿部忠秋家士山本兵部亦與焉別木曰首謀實石橋也僕等從其謀耳石橋曰是何言也僕以兵法教授於家彼皆來受業一日來問曰今日欲舉兵如何而可僕答曰止戈為武未聞倡亂以為武也彼又曰祖先之讐而為諸侯吾欲報仇如何僕曰以計擾衆耳彼問其計僕曰我兵數百人散處衢巷剋期縱火人心駭懼所在騷擾或可以集事矣彼

乃耳語曰。我今聚衆將火增上寺奪財貨。執政有來  
救者。我伏兵遮擊。乘勢縱火所在耳。即以盟書示僕  
請署名。僕驚曰。子不見由井正雪之事乎。謀未及施  
而赤其族。為天下笑。奈何踐其覆轍。子無乃試我與  
彼作色曰。吾既告以密謀。何得不盟。且今日之謀。若  
實發之。吾必以君為主盟。僕辭以他故曰。請必閱盟  
書然後議之。其後彼屢來訪。僕答以不在。事之本末  
如此。乃以僕為首謀何也。信綱問別木曰。石橋言信  
否。別木曰。誠如石橋言。然彼教僕以籌策。非首謀而  
何。石橋曰。僕言出於無心。初不知其有異圖。何謂首

謀。忠秋讓石橋曰。汝既不黨彼。何不速去。汝若知而  
不告。是亦賊也。石橋不能答。忠秋詰問山本。答曰。彼  
一日來訪。授書一卷。曰。請署名。臣曰。是何書也。彼曰。  
子閱書自知之。臣辭以有他客。彼留書而去。臣竟不  
披閱。不知為何事。忠秋曰。何不一閱。曰。臣心疑之。是  
以不閱。忠秋曰。汝既疑之。何不以其書示我。山本不  
能答。二十一日。礫別木莊左衛門林戶右衛門三宅  
平六藤岡又十郎石橋源右衛門於淺艸。親族皆處  
斬。山本兵部以不預謀。減死。忠秋殺之。冬十一月八  
日。以丹後守渡邊吉綱為大坂城番。封之和泉伯太。

賜一萬三千石。十二月二日。將軍所生增山氏卒。二年春正月十三日。先是麴街及芝里民請引八王子田場川為井。是日許之。給其經費。十五日紅毛來聘。夏五月十九日。命修造伊豆三嶋社。先是社司來江戶。請曰。今諸有司盟誓。遵貞永式目。必舉伊豆箱根三嶋三神。而今兩社則。幕府修之。獨不及三嶋。何也。神威寧有優劣乎。將軍然之。乃有是命。六月二日。勘定頭前播磨守伊丹康勝卒。子勝長嗣。康勝鍊達吏務。勸農桑通商賈。與民同利。一時稱為循吏。甲斐產小紙。一貫人納金。幕府以收其利。或欲增

千金以奪之。有司將許之。康勝固執不可。執政問曰。千金雖微。足資國用。何謂無益。康勝曰。公等有禦盜之術則可。執政怪問。康勝曰。小紙貴賤所用。不可一日無也。惟其價賤。故上下不困。今彼欲增千金以收其利。此不過欲貴紙價以償之耳。彼一貴其價。取於彼而鬻者。價益貴。紙價已貴。貴賤皆困。賤商必將貴他物價以償之。是紙價一踊而百物皆貴也。百物皆貴。其極必至。小民窮而為盜。公等將何以禦之。國家果能節用。一歲贏餘。不知其幾千萬金也。今以千金之微。困天下之民。何以異於剖肉充腹哉。執政歎服。

九日造大猷公廟於紅葉山。二十三日京師火。皇宮罹災。閏月朔遣若狹守吉良義冬於京師。獻黃金二百板及銀茶臺描金硯函畫屏等物。是月前肥後守加藤忠廣卒於莊內。秋八月十二日將軍叙從一位任右大臣。將軍弟長松任左近衛權中將兼左馬頭。德松右近衛權中將右馬頭。竝叙從四位下。尋賜長松名綱重。德松名綱吉。時人謂之兩典廐。二十五日遣會津少將源正之於京師謝恩。是月安藝備後周防長門肥後大風水。九月二十八日琉球來聘。冬十月十四日帶刀杉原重光死無子。没但馬豐

岡三萬石。二十日富士天龍二川堤決。遣使檢之。十一月二十日始謁寬永寺。大猷公廟是歲命肥前守松浦鎮信築砲臺七基於長崎。京師兒女無故戲放火。火災屢作。所司代板倉重宗捕誅之。乃止。世以為人妖。

三年春正月二十八日紅毛來聘。二月十二日筑前侍從黑田忠之卒。殉者十八人。子光之嗣。夏四月二十三日丹後國主京極高廣致仕。子高國襲封。二十六日夜有狂夫橫行街市。殺九人。傷十一人。捕而誅之。秋七月二十九日京師所司代板倉重宗罷。重宗

野史彙編 卷三  
一  
在職三十餘年。民敬之如神明。愛之如父母。每聽訟。必面向遙拜默禱。乃出臨廳事。親自碾茶。隔紙障聽之。未嘗視訟者顏色。人問其故。重宗曰。吾聞愛宥神。甚有靈。吾斷訟。一有不公。欲神殛之。此吾之所以默禱也。凡聽訟之明暗。由吾心之動靜。吾心靜則茶之落磴必細。心動則茶亦不細。此吾之所以碾茶試之也。人之面貌有獐惡者。有溫柔者。吾先視其面。則未聽其辭。而邪正曲直。既決於胸中矣。及聽其辭。往往如吾意。然人之難知。不可以外貌卜。獐惡者未必皆邪。溫柔者未必皆正。此吾之所以隔障而聽之也。其

用心鎮密如此。或問曰。子之治京。孰若先人。曰。吾父時訴者。妻子往往來訪。牽袂哀訴。吾父出而決訟。退謂其妻子曰。吾非不憫汝。奈不直何。妻子屈服。無有怨色。吾不能及。八月朔。長崎奉行報曰。清僧隱元來。是月備前大水。國主池田光政命其臣熊澤伯繼治水。伯繼率群吏赴上流。踞石眺望久之。忽令曰。唯吾馬蹄是視。乃跨馬沿川而去。群吏逐其馬跡。樹標發役夫築堤。新鑿一渠。是後備前免水患者百餘年。伯繼本姓野尻氏。為外祖熊澤守久所養。年十六仕備前。尋辭祿而去。從近江人中江原學。研精數藏。光政

野史纂要 卷三  
召還之。擢為番頭。授三千石。委以政事。聲績之美。冠一時。遠近想望。風采常從。光政至江戶。諸侯皆爭延見。天猷公聞其名。將召見。會薨而止。原稱與右衛門。倡明人王守仁之學。以德行聞。九月二十日。天皇崩。二十七日。遣若狹守吉良義冬於京師。會葬。冬十月二十八日。以佐渡守牧野親成。為京師所司代。命曰。每事必諮訪。板倉重宗。

後西天皇明曆元年春正月十四日。紅毛來聘。二月十四日。戶田氏鐵卒。年七十九。二十一日。美作守水野勝俊卒。殉者三人。子勝貞嗣。三月十一日。將軍

召諸侯觀散樂。是春備前大饑。國主池田光政發倉廩賑濟。不能徧境內。謀之老臣熊澤伯繼曰。緩議曠日。民將餓死。臣請赴江戶。就天樹夫人哀訴。光政從之。乃往江戶。訴夫人。夫人為請。將軍貸四萬金。光政悉散之。境內民賴以全活。光政夫人女婿也。秋七月二十一日。召寺社奉行町奉行勘定頭。命曰。卿等有所言。宜面告之。勿有隱諱。九月十九日。江戶火。延燒六百八十餘家。冬十月八日。朝鮮來聘。是歲。將軍初萬福寺於山城宇治郡大和田。擬足利氏天龍相國諸寺。以清僧隱元為住持。



二年春正月三日。將軍遣右京大夫松平頼重於京師。賀騰極。令諸侯五萬石。已上遣賀使。獻白金。二十九日遣安房守北條氏長。巡察關東八國。二月十九日。先是片桐助作死無子。以弟又七郎為嗣。是日賜三千石。削七千石。三月二十六日。織部正日根野吉明卒。無子。沒豐後府內一萬石。是月。將軍患痘瘡。諸侯皆遣使伊勢。禱於大神宮。夏五月十七日。暹羅人來長崎。二十七日。大老若狹少將酒井忠勝致仕。子忠直襲封。秋八月四日。徙封周防守板倉重宗於下總關宿。十八日。先是駿河城番伊勢守稻葉正

能自殺於城中。將軍遣北條氏長等驗視。其尸似為人所殺者。於是同族美濃守正則召正能家衆至江戶推問之。老臣安藤甚五左衛門謂衆曰。寡君近喪愛女。憂鬱喪心。遂至此言。畢流涕。衆憫之。攝津守天田資次謂正則曰。彼不可信也。藉令正能果狂。彼不宜顯言於稠人中。况事涉疑似。彼宜窮治。近侍以決情偽。而今徒流涕。安知其非偽。正則然之。乃問衆曰。正能近侍孰與安藤善者。衆以松永喜內對。正則捕喜內訊鞠。不服。以計驗問。果與安藤私通。畏誅。弒之也。將軍以二人賜正則。是日正則焚殺二人。連

坐者多。將軍命正能子正休襲五千石。二十一日大風駿河城壞。冬十月十三日駿河民請鑄錢許之。十六日吳服街火。延燒八百六十餘家。二十五日始召柳生內膳學擊劔。賜衣服。晦伊豆守真田信幸致仕。長子信吉先卒。次子信政襲封。分三萬石。授信吉子信澄。十二月朔周防守板倉重宗卒。年七十。子重鄉嗣。十二日始召林道春講大學。賜衣服。二十四日遷茨原街倡家於淺草山野村。

三年春正月二日四谷火。十八日風霾蔽天。本鄉火。延燒神田駿河臺至鐵砲洲。夜半始滅。死者數百人。

十九日又大風。小石川火。適麴町亦火。風益猛。煙燄四合。延及府城殿守。將軍避之西城。時信濃守小笠原長次帥衆警衛大門。自付兼松下總守馳報長次。曰：幕府已遷西城。君何不往警衛。長次曰：吾職在守大門。寧焚死不可去。兼松往告執政。執政再遣兼松諭之。長次乃至西城。風火益猛。前讚岐守酒井忠勝建議曰：上下危駭。事變難測。請密避之。臣別墅。伊豆守松平信綱請避之。寬永寺。掃部頭井伊直孝請避之。直孝別墅。議未決。豐後守阿部忠秋進曰：諸臣何所見而建此議。忠秋所不解也。欲避火邪。藉令

災及西城。城中猶有隙地。可以避火。奈何去城。欲備  
變邪。尤不當去城。以閫職之重。一旦去城。物情恟駭。  
適足以激變。城之不可去。亦明矣。國家鎮撫四海。  
已四世六十年。天下莫不被德。川氏之澤。誰敢包藏  
禍心者。萬一奸民嘯聚。即命諸藩剪滅之耳。何至為  
畏避之計乎。然將軍欲從衆議。則臣不敢止。臣將  
獨守此城以報。故將軍。將軍曰。卿言是也。吾去  
城焉往。議乃決。忠秋使子播磨守正能帥兵數百陣  
西城下。火及其家。不敢還。越中守細川綱利第亦罹  
災而不救。帥兵至西城。遣使請警衛。陸奧守伊達忠

宗遣使報曰。府下駭擾。恐有佗變。忠宗既分兵扼品  
川。千住兩口矣。敢報。紀伊大納言與尾張中納言登  
城。至吹上門。衛兵欲過之。大納言厲聲叱。右左。目光  
如炬。衛兵畏服。府下謬傳。將軍避火。他處故諸侯  
多不至西城。火不滅者。一晝夜。諸橋皆斷。焚溺無算。  
海濱士庶航海而逃。風濤暴急。舟皆覆沒。衆或逃至  
郭門。門閉。風燄將及。爭緣石壁。擲下。死者相枕。二千  
日。火始滅。大城蕩盡。西城僅完。府下悉為焦土。萬石  
已上。罹災者一百六十家。松平信綱建議。欲使之悉  
就國。議者或慮其有異圖。諮之酒井忠勝。忠勝贊成。

之議乃決。紀伊大納言聞之大怒。信綱往謁大納言曰：今日之變，諸侯在國者亦當召之。奈何使之就國？且天下大議，何為不謀於我？信綱曰：今府下焚蕩，米穀掃地，令諸侯留府下，何以糊口？是上下皆饑，不可得救也。公憂其叛耶？孰若叛於國？今府下有變，何策禦之？若叛於國，我徐為之備。此信綱之所以不謀於公也。且今日豈緩議之日乎？大納言稱善。二十一日，諸侯登城弔災。將軍命有司給粥，市人皆無食器，至拾瓦片受粥，如酒井忠勝開火作，遣人近郊買米穀，已而米價騰踊。忠勝振贍多所全濟。信綱建

議以金代穀給麾下，陪其價。諸國聞之，爭輸米於江戶。米價稍平。紀伊大納言素有重名，至是府下流言，紀伊殿乘災謀不軌。適紀伊漕船以穀三千斛至，大納言悉獻之。流言乃熄。二十二日，命河內守井上正利壹鼓守小笠原。忠知出羽守水野忠職監物。水野忠善等巡警府下，逮捕盜賊。二十五日，禁奢侈。二十六日，懸賞格索放盜賊。二十九日，焚殺放火賊。二十餘日，松平信綱患府下屢火，欲誅失火者以懲後。井伊直孝駁曰：萬一三藩貴戚失火，將奈之何？令而不信，何以為政？信綱驚謝曰：微君殆誤事矣。二月七日

命備中守阿部定高毀腰谷別館遷之二九命美濃  
守稻葉正則若狹守松平直明運土填火藥庫址命  
采女正戶田氏信獻畚鍤八日傳諸侯在國者今年  
參府時上功竝起木價踊貴是日令曰大城營築必  
待來年諸藩第宅士庶廬舍務從質樸於是諸侯皆  
取材於國木價頓賤將軍欲賑恤罹災者執政患  
府帑耗費會津中將源正之曰散材恤下何費之有  
九日賜麾下士罹災者銀十日貸諸侯罹災者銀十  
五日頒賜金十六萬兩於江戶市人二十九日先是  
將軍使源正之詣增上寺正之途見焚尸成丘憫之

謂執政曰方今海內人民輻湊府下而一旦焚死投  
尸溝塹任其漂去何慘也臣收瘞焉執政然之是日  
瘞焚尸於本莊牛嶋凡九千六百五十三人創一寺  
號迴向院初大城之災諸有司多惶擾失措執政欲  
論其功罪正之曰自東照宮徙江戶已七十年未  
有大災如今日者故救火之制甚疎今日功罪不必  
論唯當定其制以備他日之災耳三月三日更賜諸  
侯第地是後三藩宗室多賜邸第於郭外又許萬石  
已上賜別墅慶長中諸藩始賜第地於江戶土木殫  
極技巧雕鏤精絕金碧晃耀加藤清正刻五犀於門

大如馬市人或造三層樓窓牖塗以黑漆其豪侈如此至是土木稍從儉樸云六日讚岐九龜城主山崎治賴死年僅八歲沒九龜四萬石二十四日信濃守鍋嶋勝茂卒年七十八殉者二十一人孫光茂嗣夏五月四日賜地木願兩寺創精舍西寺八町堀東寺淺草各方百間府下始有本願寺九日經始本城執政欲先營殿守源止之曰殿守非古制也不宜以此屈民力議遂寢秋七月四日召大目付及目付口有所欲言直言無隱十日將軍聘兵部卿貞清親王女九月十日遣小十人於諸國伐材木十三日

天皇遣使賀新婚二十七日命加賀肥後諸藩助本城之役一萬石役夫一百人是歲水戶世子始修國史自朝廷既衰國史廢缺者數百年兵革相踵諸家記載往往散軼及東照宮定海內廣購典籍收集殘缺而國史之舉未暇及也世子年十八讀伯夷傳歎曰不有載籍虞夏之文不可得而見不由史筆何以俾後之人有所觀感於是始有修史之志屢與儒臣語及之儒臣皆難之世子奮勵遂根據正史錯綜群書以正閔皇統是非人臣為己任及後襲封招致才俊搜索逸書訂疑辨誤竟能成其志云

萬治元年春正月十日江戸大火。諸侯第宅多罹災。十二日小石川火時府下屢火。執政日直城中懸賞格捕放火賊。十三日命天和守松平直矩下總守奧平忠弘大膳大夫伊達宗利日向守水野勝貞甲斐守黑田長興左近大夫高力隆長為防火備。十五日紅毛來聘。十八日賑遭災之家。秋七月十二日仙臺少將伊達忠宗卒年六十。殉者九人。子侍從光宗先卒。次子綱宗嗣。八月十五日畿内及備前丹波大水。造殿守礎石。冬十月十二日加賀前中納言前田利常薨年六十六。十一月朔出羽守北條氏重卒。沒懸

川三萬石。黃八幡之後。亾矣。是日清僧隱元謁將軍。二十一日遣使巡察郡國。十二月伊勢内宮火。閏月六日遣大隅守石川正次於伊勢。權造宮安神鏡。十九日以美濃守稻葉正則為老中。是歲徙封左近將監松平忠昭於豐後府内。

二年春正月十一日將軍加首服。二十五日京師火。二月三日徙封彈正少弼增山正利於參河而尾。二十八日紅毛來聘。晦日光地震。夏六月二十八日彦根中將井伊直孝卒年七十一。子直澄嗣。直孝歷事四世。以耆宿見重。大猷公之薨。直孝招林道春

曰。為我。說古人輔幼主之道。乃討論數日。道春語人曰。非伊氏武人不識字。然至其言行。往往闡合古人矣。酒井忠勝嘗曰。直孝可謂柱石臣矣。天下每有大事。衆論鋒起。人人危疑不能決。唯直孝奮然曰。天下之事。極於今日。辭氣決烈。意在必死。一座為之奮激。遂能排難解紛。如此者。凡三。吾等非不以忠義自許。然至善斷大事。輸直孝一籌。其日有大事。執政必有思直孝者矣。其見推服如此。秋七月四日。增大番隊一百十四人。九月五日。本城成。徙居焉。六日。定諸侯鹵簿入城之數。冬十月二十六日。靈岩嶋火。是歲。右

衛門佐黑田光之築石堤於博多海中。以便商船。長數町。三年而成。

三年春正月十四日。湯嶋火。二十日。揭榜街市。捕放次賊。二十八日。紅毛來聘。二月十三日。命陸奧守伊達綱宗。穿新溝。自筋違橋至牛籠土橋。以通漕運。二十四日。京橋街火。三月五日。捕放火賊四人。夏六月十八日。震大坂城樓。延燒火藥庫。激怒震地。沙石飛揚。樓櫓壞。殿守石壁崩。死者數百人。秋七月五日。遣伊豆守松平信綱於大坂。修城樓。六日。紀伊大雨。水。二十八日。日光大水。廟下石壁崩。八月二日。命美作



守與平忠昌修之。三日賜杖酒井忠勝聽杖殿上。忠勝薙髮號空印。將軍以宿老特優遇之。冬十一月三日上野介堀田正信坐喪心沒佐倉十萬石賜子正休米一萬石。初正信致書執政曰。將軍自襲職已十歲。輔臣失道。上下罷弊。宜施慈惠以贍窮乏。請先獻臣城邑以充其費。乃不告而就國。執政會議。松平信綱曰。正信喪心。源正之曰。彼志在報國。何謂喪心。信綱曰。彼欲輸城邑。唯當待命邸中。何乃不告而就國。狂悖甚矣。彼名臣子而一旦至此。吾不忍殄滅之。故以為喪心。一座稱善。執政遣對馬守安藤重貞

諭正信曰。卿不去國。卿言不得上聞。卿其屏居二弟采地。正信乃赴弟備中守正俊封邑。尋命弟中務少輔安吉錮之。信濃飯田是歲命仙臺少將伊達綱宗致仕。傳國子綱基。綱基年僅二歲。因命兵部少輔伊達宗勝攝國事。宗勝政宗季子也。先是宗勝潛蓄異圖。宣言綱宗喪心。乃與老臣伊達宗重片倉小十郎等議。請將軍傳國於子。將軍許之。已而宗重小十郎請曰。使宗勝獨攝國事。恐不厭衆意。願使隱岐守田村宗良與俱當國。將軍許之。宗良忠宗子也。宗勝與雅樂頭酒井忠清婚。權勢薰灼。引原田宗輔

為親黨宗輔傾險有材幹國事悉決於二人宗良備員而已綱宗屏居品川第抑鬱無聊鍛刀劍自娛寬文元年春正月十五日二條關白光平第火延燒大内公卿第宅多罹災二十日瀧口火評定所傳奏館及諸侯第宅多罹災二十四日造評定所傳奏館二十七日將軍遣刑部大輔今川範貞於京師獻白金一千枚及御衣三月三日紅毛來聘先是以正月為聘期至是以變夷舍館屢罹災命緩其期以正月發長崎十五日令郡國搜捕盜賊禁百姓蓄鳥銃二十二日將軍放鷹隅田川二十九日小石川新

渠成將軍臨觀焉夏四月十日以新渠成賜伊達氏家臣有差二十三日以越中守小出尹貞為造大内使五月十一日將軍放鷹隅田川二十九日地大震六月長崎奉行報曰紅毛人據臺灣者為明人鄭成功所破走至長崎秋七月二十九日水戶中納言薨年五十九遺命世子曰國俗以殉為禮君而照殉者稱不君臣而不殉者稱不臣不仁甚矣汝必禁之家臣真木景猶山野邊義忠等皆欲殉之世子聞之親往其家諭止之閏八月三日徙封和泉守松平乘久於下總佐倉六日命諸藩造公卿第宅九日封

左典廐於甲斐。右典廐於館林。竝食二十五萬石。是月會津中將源正之禁家臣殉葬。正之嘗讀詩黃鳥篇。至臨穴惴惴。慨歎不已。遂禁之。後水戶之禁僅三月。人以為奇。冬十二月二十八日。兩典廐任參議。二年春三月朔。紅毛來聘。十六日河越侍從松平信綱卒。年六十七。子輝綱嗣。信綱銳敏絕人。鍊達時務。大猷公之薨。由井正雪潛謀縱火舉兵。事覺。仇誅後數年。江戶大火。人疑其餘黨為之。上下喧駭。衆情恟懼。信綱從容區畫。事無壅滯。人心賴以安。議者以為不愧古之賢佐。及病篤。阿部忠秋往省之。因曰。子天

下奇才。不才如我。若得代之。死亦無恨。信綱出書一軸授之。曰。此吾生平欲所施行也。子幸取舍而行之。其用心。國事如此。將軍罷諸藩任子。禁天下殉葬。皆信綱之所議定也。二十九日以因幡守青山宗俊為大坂城代。罷輪番。夏五月朔。京師地大震。二條城崩。三日。將軍放鷹隅田川。六月四日。徙封日向守。酒井忠能於信濃小室。十二日。攝津河內大水。是夏江戶疫癘大行。秋七月十二日。若狹前少將酒井忠勝卒。年七十六。忠勝典樞機三十餘年。為天下所憑賴。大猷公最親任之。嘗欲封以駿河十八萬石之

地。忠勝辭曰。此東照宮菟裘之地也。臣不敢當。後  
又欲封以甲斐二十四萬石。又辭曰。此武田氏割據  
之地也。臣不敢當。公遣人諭之曰。卿不欲去若狹  
吾當給鄰近之地。近江二郡。卿勿復辭。忠勝又辭曰。  
臣之所以辭封者。亦有說焉。自古執柄之臣。祿厚則  
驕。驕則覆。如本多正純。可以見矣。臣而受厚祿。安知  
異日之不生侈心。臣縱能恭謙終身。又安知子孫之  
不招禍。故臣之辭封。非特為一身也。公嗟歎而止。  
忠勝晚年好學。博涉典籍。語人曰。令我學於十年前。  
必有所施設。今不及矣。冬十一月。水戶參議禁沃水。

之戲。國俗有新婚者。遭歲首。少年携至衢巷。沃之以  
水。或至毆鬪。參議以為昏姻禮之大者。不宜溷以非  
禮。命禁之。十二月。會津禁沃水。

三年春正月二十六日。天皇讓位。皇太子。  
是為靈元天皇。三月八日。增雅樂頭酒井忠清。

封三萬石。豐後守阿部忠秋二萬石。美濃守稻葉正  
則一萬石。三月朔。紅毛來聘。二十七日。天皇行。

即位禮。夏四月十三日。將軍如日光。五月二十三  
日。令天下禁殉死。初。東照宮嘗論殉之非禮。諸藩  
亦往往悟其非。然承戰國流弊。因循不改。惟水戶會。

津僅禁之。至是其禁始布天下矣。秋九月朔大坂城番主膳正鳥居忠春至大坂。未入城。為醫師所殺。京師商人佐野某迎忠春。適變作。乃以身蔽捍。被創而死。初忠春祖元忠死難。商人佐野四郎右衛門潛收其首葬之。某即其子也。忠春子忠常襲封。二十三日天皇遣使江戶。告即位。二十七日饗天使奏散樂。二十九日以豐前小倉城主小笠原忠真為鎮西探題。初嶋原之亂。西海諸藩皆出兵。而無一統帥。故諸軍觀望不敢進。賊遂熾。至是置探題統鎮西軍事。是冬水戶參議立兄子綱方為世子。參議之襲封聚兄弟。

於家廟謂兄賴重曰。我以弟為儲嗣。實所不忍。然先君在世。晦迹去位。則人將謂父子不睦。所以濡忍。至今吾願請兄子為嗣。不則吾不敢襲封。賴重固辭。弟賴元賴隆德憑之。賴重不得已而許之。參議大悅。遂請幕府立之。賴重養參議子賴常為嗣。

靈元天皇寬文四年夏五月七日。米澤侍從上杉綱勝卒。無子。養上野介吉良義夾子景隆為嗣。削米澤三十萬石之半。後賜名綱憲。十一日徙封伊賀守。戶田忠昌於肥後。天草閏月。將軍觀散樂於西城。水戶參議遣儒臣於長崎採訪。明人流寓有才學者。先

是清兵入明。闔國靡然。薙髮變服。冠裳之俗掃地矣。儒者愧之。往往航海歸化云。冬十月十八日。將軍放鷹隅田川。是歲徙封出羽守三宅康雄於參河田原。大坂彗星見。五年春正月二日夜。震大坂城。殿守鴟尾。殿守火。衆謂城番板倉重矩曰。奈火藥何。重矩曰。吾已遷之私第。乃與城代青山宗俊議曰。殿守高峻不可得救。唯當救他樓櫓。即分衆守諸門。重矩守京橋。植柵設門。業弓銃備變。令別隊救火。殿守五層悉焚。火終夜不滅。城下皆懲萬治之災。驚譟曰。吾輩得無殲於火。

藥耶重矩令曰。火藥皆已投壕中。城下乃定。重矩豫以鉅貝為符。授近地民曰。城中有火。汝等持此入城。攜士卒妻孥避火。繇此婦兒皆得避去。不損一人。大膳亮青山幸利。帥衆從尾崎來救。試拔重矩柵牢密。不可撼。乃服遲明火始滅。樓櫓咸全。三月會津中將源正之聘京師人山崎嘉為師。嘉幼時為僧。穎悟絕人。及長遊土佐。土佐人野中止一見器之。勸讀聖經。嘉感悟。遂蓄髮為儒。還京教授。又學神道於吉川惟足。立一家說。自號垂加。世有垂加神道始此。秋七月。水戶參議聘明人朱之瑜為師。之瑜字魯與。明浙江

餘姚人。精研六經。特通毛詩。見明政日衰。絕意仕進。明主屢徵之。不就。及清兵渡江。航海避亂。漂泊交趾。暹羅之間。明人素服。中國威武。往往來乞援之。瑜亦來。長崎人莫能識。柳川人安東守約。折俸之半而養之。至是參議厚禮聘招之。瑜慨然赴之。參議自執弟子禮。禮遇甚隆。之瑜以國讐未復。為憾。言及之。輒切齒流涕云。冬十月二十五日。將軍放鷹田隅川。十一月二十九日。命脩相模箱根鶴岡武藏六所等社。十二月五日。命京師所司代修葺馬北野豐國等社。二十七日。以但馬守土屋數直內膳正板倉重矩

為老中。二十七日。越後地大震。高田城崩。老臣小栗五郎左衛門。秋田隼人。壓死。是月水戶參議。毀境內淫祠三千八十八。是歲。傳以銀易紅毛雜貨。始用金。六年春三月十五日。紅毛來聘。二十日。命長崎奉行。勿受外蕃贈遺。夏四月十九日。禁諸侯從者過馬三匹。槍七條。五月三日。流丹後侍從京極高國於陸奧南部。子近江守高賴於伊勢。其餘子女皆命諸藩錮之。初。高國父高廣。馭下暴橫。國中怨嗟。及高國襲封。釐革弊政。撫循人民。一國大悅。已而高國意稍驕恣。踈棄宿老。寵信新進。專殖貨利。賦歛日重。境內大困。

高廣潛謀廢高國立次子高勝。高國知之奉養甚薄。高廣積怒遂上書訴高國橫虐。以為將軍必不忍奪我國。至是高國獲罪沒丹後七萬五千石。高廣窘迫匿於京師。將軍憫之。歲給五百金。尋遣大膳亮青山幸利於丹後。收其城地。高國老臣澤圖書見幸利曰。寡君獲罪國除。臣等敢不奉命。但將家有法束手去城。奈天下之笑何。臣請剖腹以授城。幸遣使驗視。幸利曰善。乃馳使報江戶。將軍命高國手書諭之。圖書等輸城而去。秋七月。水戶參議毀境內新寺九百九十七。髮三百四十四。寺僧破戒者為編氓八

月二十一日。增老中土屋數直板倉重矩邑各二萬石。九月會津中將源正之毀境內新寺。冬十月。錮處士山鹿高基於播磨赤穂。高基以兵法教授弟子甚盛。又嘗著書駁宋儒。繇此獲罪。十一月八日。地大震。是歲備前少將池田光政創學校於國中。

七年春二月二十九日。將軍放鷹隅田川。閏月十日。放鷹高田。十五日。紅毛來聘。三月四日。禁種烟草於良田墾荒野者。不禁。二十六日。將軍觀猿樂於西城。夏五月二十二日。紀伊大納言致仕世子光貞襲封。大納言謂近臣曰。吾將與卿等遊宴鬪茶。以終



身近臣曰臣等恨不復能見公之指麾三軍耳。大納言笑曰卿等獨不聞東照宮浪華兩役皆在退老之後邪。二十三日信濃守水野元知坐喪心國除命出羽守水野忠胤錮之。元知妻極妬忌。元知一日召歌童宴飲。妻聞之大怒。抽短刀刺元知傷其面。妻父水野忠善奪妻。元知稱病不出。時人謂元知惑溺聲色。為妻所傷。遂坐沒上野安中二萬石。六月八日徙封備中守堀田正俊於上野安中。正俊加賀守正盛第三子。幼時為春日局所養。食三千石。後割父邑賜之。食一萬三千石。是日增五千石。十九日徙封大和。

守松平直矩於播磨姫路。式部大輔神原政倫於越後村上。秋八月十五日參河遠江大水。九月二十二日盜竊伊勢外宮寶刀。冬十月二十三日斬盜寶刀者。右衛門佐黑田光之獻小人嶋康大如兔。十一月四日將軍觀散樂。十二月二十七日賜京極高勝米五千苞。是歲遣使巡察西海諸侯。八年春二月朔以老中板倉重矩攝京師所司代。修理大夫酒井忠直牛籠第火。延燒市谷門虎門及諸侯第宅。先是西方有白氣。經卯畢至參。形如長星。至是始消。六日小日向火。延燒內郭城樓。將軍避之。

西城執政諸臣入宿衛焉。八日賑街坊罹災者三千餘家。二十一日令諸侯罹災者就國。二十七日流肥前嶋原城主高力隆長於陸奥。子常長於出羽。初大猷公既平邪蘇賊。封隆長父忠房於嶋原。以其地多賊餘黨。新經兵燹。命撫輯農商以安反側。屢賜金穀。助其費。至隆長苛虐無恩。百姓大困。巡察使入其境。訴者相屬。遂坐沒嶋原三萬七十石。二十八日紅毛來聘。三月六日造虎門市谷門。夏四月七日禁百姓著絹紬十日。命老中曰。凡評定所處分皆取老中裁判。自今已後。勾當之吏處分判決。列坐之徒。宜反

覆議之。有依違難決者。取執政裁。決二十日禁庶人佩大刀。五月八日將軍放鷹隅田川。十六日京師所司代牧野親成罷。二十一日徙封甲斐守京極高任於但馬豐岡。二十一日徙封佐渡守牧野親成於丹後田邊。六月十九日將軍觀猿樂。八月三日徙封下總守奥平忠弘於下野宇都宮。削宇都宮城主奥平昌能地二萬石。徙封之忠弘舊封出羽山形。先是昌能父忠昌卒。家臣杉浦右衛門兵衛犯法殉之。昌能坐削地。杉浦二子皆處斬。殉葬始止。冬十一月十日將軍放鷹隅田川。十二月七日放鷹隅田川。

二十二日紀伊參議任權中納言。  
九年春正月十日紀伊中納言叙正三位。二月二十  
五日徙封右近大夫永井尚征於丹後宮津主殿頭  
石川憲之於山城淀隱岐守板倉重常於伊勢龜山。  
增憲之封一萬石重常五千石。三月朔紅毛來聘。夏  
四月十七日會津中將源止之致仕。子正經襲封。五  
月命安房守北條氏長作地圖。二十六日令諸國記  
道程里數上之。六月二日將軍觀猿樂。八日徙封  
主殿頭松平忠房於肥前嶋原伊豫守朽木植昌於  
丹波福知山。增忠房封二萬石。植昌五千石。十四日

將軍遣人相摸上野檢墾田。二十四日徙封大和守  
久世廣之於下總關宿。但馬守土屋數直於常陸土  
浦。初廣之食五百石。數直七百石。至是廣之食五萬  
石。數直四萬五千石。時人榮之。是月出雲加賀能登  
越中大雨水。秋八月二十一日將軍觀猿樂。是月  
肥後豐後日向大雨水。九月二十九日大學頭藤堂  
高次致仕。子高久襲封。是月蝦夷反。

十年春正月二十二日水戶世子薨。二月十四日以  
伊賀守永井尚庸為京師所司代。增封一萬石。內膳  
正板倉重矩罷所司代。老中如故。十八日封左京大

夫松平賴純於伊豫西條。賴純紀伊前大納言第二子也。二十二日以備中守堀田正俊為若年寄。三月朔紅毛來聘。九日將軍放鷹隅田川。夏四月遣使巡察關東八國。是月命長崎代官末次平藏造紅毛船送之江戶。五月九日以穀價騰踊。令諸國禁釀酒。六月十九日先是將軍命法印林恕編國史。至是成。凡三百十卷。賜名本朝通鑒。命執政以其書示三藩。尾紀兩中納言皆賀盛舉。水戶參議披閱之。至以皇朝為吳秦伯之後。大驚謂執政曰。天朝自有正史。奈何取海外妄說污蟻皇胤。且祖宗之於西

土抗禮不相下。而今乃以附庸自處。是誣祖宗也。請命改定。執政歎服。是月駿河遠江大水。秋七月清商船至五嶋。送還尾張漂民。九月三日頒新升於天下。冬十月十日前伊豆守真田信幸卒。年九十三。閏月松前兵討蝦夷平之。初東蝦夷有釋仙者。勇力絕倫。鈔掠諸嶋。衆夷畏服。礦夫莊太夫娶其女。與俱謀并松前。夷人鬼菱者歸心松前。屢與釋仙戰而未暇。報松前。一日間行至礦夫文四郎家。其地距釋仙居僅三里。釋仙偵知大喜。遣衆攻之。鬼菱單身潰圍。遂見殺。無幾松前吏與商人乘船至東蝦夷。釋仙部下

殺之奪財。有數人僅而遁還。松前始知有變。請出兵討之。將軍使麾下士松前八左衛門往援。松前將蠣崎作左衛門進入夷地。釋仙聞之。遣兵二千逆拒。松前又遣佐藤權左衛門松前儀左衛門仁井田瀨衛兵等繼進。八左衛門亦來會。與夷人夾水挑戰。我兵發二百餘銃。斃夷百餘人。夷多發毒矢。我兵甲堅不傷。夷遂敗走。我兵濟水追擊。夷據山。我兵吹螺進薄夷下山。泅水逐逃。僅擒十六人。權左衛門命解縛為軍導。夷又阻大川而陣。權左衛門令譯官勸右衛門誘諭之。勸右衛門乃袒裼登高呼曰。大將從江戶

來討汝等。行當擒戮。即子孫亦無了遺。何不及今降附。吾必為汝丐命。汝猶欲相抗。試射吾胸。乃拊胸示之。夷聞江戶兵來大驚。往往解甲投刀。以二十船來降。八左衛門乘夷船擊餘黨。斬釋仙一將而還。諸將尋進討。權左衛門以百餘人先驅。降所在夷賊。距釋仙居一里許而陣。遣使問汝欲戰乎。欲降乎。速告我。釋仙大懼。以六七十人來降。權左衛門遣人讓曰。降入常解甲棄弓矢。汝則不然。何無禮也。速還汝廬。待我兵釋仙。乃解甲棄弓矢而進。權左衛門脫刀延見。曰。汝罪不容死。何不獻物一千贖之。釋仙遣人取雜

貨一千獻之。權左衛門收八百品，却其餘曰：「是不足取汝。」他日更獻他物，乃留釋仙及魁首二十餘人。婦二人延之，曠夫家放還其餘，以酒數斗賜釋仙等。密遣人報後軍，至夜後軍咸至，合圍大喊，夷驚而逃。我兵悉斬之，釋仙獨端坐受刃而死。衆進攻，釋仙墨夷皆逃。亡乃引還莊大夫帥餘黨，追尾我兵，還擊破之。擒莊大夫，燒殺之，夷地悉平。

十一年春正月十日，紀伊前大納言薨，年七十。號南龍院。大納言材武絕倫，尤為東照宮所鍾愛。其後頗以此見忌，然於諸公子中享年最永，故聲名震天。

下晚年好讀書，與儒臣相唱和云。十五日京師火。二月十日增內膳，正板倉重矩封一萬石，兵部少輔伊達宗勝輔仙臺少將伊達綱基專權擅勢，縱恣日甚。闔國憤怒，伊達宗重屢歲規之不納，乃慨然曰：「吾不忍坐視國之危亡。」是月託後事於片倉小十郎，遂來江戶。訴宗勝及原田宗輔姦，板倉重矩召之於家詰問。宗輔辭理明晰，應答如響。三月二十七日執政會雅樂頭酒井忠清第，召重宗宗輔對辨。宗輔辭屈，二人既退，俄而宗輔挺刀斫殺宗重將入擊執政。一坐擊殺之。夏四月三日，流宗勝於土佐，子宗興於豐前。

命隱岐守田村宗良屏居連坐者衆。六日將軍召  
 綱基曰家衆暴恣一國將亂罪亦大矣。然卿未嘗預  
 政故釋而不問。自今卿其親政宗輔老臣片山隼人  
 聞宗輔死奉其子大內藏據信夫城片倉小十郎遣  
 使諭大內藏曰卿欲城守以抗主君豈非以罪人之  
 子必見誅耶。我與卿父親善將營救卿。卿速出城。大  
 內藏問之隼人。隼人曰主君勿墜彼計中。請斬其使。  
 大內藏遣人謂使者曰隼人不聽吾不得出城。使者  
 謂之曰若欲全身何不殺隼人出降。大內藏然之發  
 銃殺隼人。使者聞銃聲入城。以大內藏及其弟還仙

臺。小十郎尋皆殺之。初綱基老臣伊藤采女贈書宗  
 勝曰前少將時國家將亂故幕府命君輔幼君。而  
 君今輔導失宜讒黨競進危亡之勢殆過前日。昔先  
 君命僕父執政。僕父固辭不許。乃請曰雖卑賤之言  
 有理者必用。是臣所願。若許之則就職。先君許之。今  
 僕雖不肖。將繼父志。所以規君也。君能改之則善。不  
 悛則僕將訴之。幕府其叔父七十郎筆也。宗勝覽  
 書大怒。然恐其訴。幕府偽優容之。時莫府以綱  
 基尚幼。每歲遣目付於其國巡察。歲首與老臣宴。目  
 付與茂庭周防善。先觴之。采女怒告七十郎。七十郎

見目付讓其違禮。目付謝以不知。宗勝聞之。潛召七十郎至江戶。宣言彼無禮於目附。必獲罪。莫府七十郎聞之大驚。夜潛逃還國。宗勝遣人誘采女捕七十郎。七十郎大怒曰。汝墜奸人計中。必死彼手矣。不食而死。宗勝之誣陷善良。率此類也。六月三日。豐後守阿部忠秋致仕。子正能嗣。秋七月三十一日。琉球來聘。八月二十一日。將軍觀猿樂。二十九日。江戶大雨。水兩國橋將壞。大和守久世廣之率衆救之。橋乃得完。荒川利根川皆溢。遠近廬舍多漂沒。千住六鄉二橋皆壞。冬十一月。將軍放鷹隅田川。十二月。

十二日。甲斐守松平輝綱卒。年五十二。輝綱好武。督勵其下。講習武技。韋馬器械。莫不精良。往往創意造戎具。世人模其制。呼曰甲斐殿樣。輝綱少時從父討邪蘇賊。然非有戰功。而終身以武著稱。人以為奇。是冬內記本多政勝卒。年五十八。先是姪政長既長。任中務大輔。政信任監物。而政勝負兄言。不還十五萬石於政長。僅割三萬石授之。割一萬石授政信。政信卒。政勝又使己子忠英為之嗣。至是始還十二萬石於政長。傳六萬石於己子政利。自是政長政利相惡。如水火。



十二年春二月十一日。將軍放鷹隅田川。二十三日流處士與平源八與平傳藏夏目。外記於伊豆大嶋初源八父內藏助事與平忠昌。忠昌之卒內藏助與同族隼人會於佛寺。隼人嘲詈內藏助。內藏助怒斫之。隼人亦抽刀格鬪。以救解內藏助積憤自殺。忠昌子昌能逐源八而不問隼人。於是傳藏外記皆致仕而去。外記源八母弟傳藏同族也。二人皆欲助源八報仇。隼人懼而走江戶。招弟主馬於出羽。源八等聞之。要擊於途殺之。遂赴江戶。聞隼人匿於麾下。士戶田某市谷第。夜帥七十餘人襲之。爭擲炬門外。連

呼失火奪門而入。會隼人不在。乃殺其父半齋及左右數人而去。遲明隼人跨馬擁十餘人。追及於牛籠傳藏盤槍還鬪。鎗隼人仆之。衷甲不傷。乃投槍相搏。遂擠之。塹令源八馘之。源八與傳藏外記投一士人家。使其徒散去已而。幕府下令大索三人。詣掃部頭井伊而澄第請就死。直澄感其孝義具白。將軍請減死。因有此命。直澄使兵士護送。後遇赦而還。直澄授之祿云。三月三日紅毛來聘。獻輿地圖。夏五月十四日徙封中務少輔。脇坂安吉於播磨龍野。六月十一日備前少將池田光政致仕。子綱改襲封閏月

三日徙封內膳正板倉重矩於下野烏山秋八月紀  
伊中納言獻創業記考異十卷九月二十六日將  
軍放鷹隅田川冬十一月二十一日放鷹千住十三  
月十八日會津中將源正之卒正之以宗室鎮邊陲  
負天下重望與水戶參議備前少將齊譽是歲石川  
重之死年九十重之參河人家世事德川氏祖正信  
死長湫之役重之事東照宮為近臣大坂之役重  
之嬰病不能從母致書曰汝今日無功吾不復見汝  
重之力病而發犯令先登斬二級近臣獲首級者僅  
重之等三人耳東照宮以其違令不之賞重之曰

不辱祖先吾事畢矣尋辭祿屏居讀書耽詩但馬守  
淺野長晟嘗聘之重之以母老應之及母沒復隱於  
京師後徙居比叡山麓後光明帝聞其工隸書  
勅獻之其名重一時如此

延寶元年春三月朔紅毛來聘夏五月九日京師火  
延燒大內二十五日諳尼利亞船來長崎請互市  
幕府問之紅毛人對曰彼近娶波爾杜瓦爾國主女  
且與南蠻往來不可信也乃却之六月朔內膳正板  
倉重矩卒年五十七子重通先卒孫重宣嗣重矩短  
小眇目貌甚醜温和有度量執政九年中鎮京畿三

年聲績著聞。一時稱為良臣。少時嘗扁其居曰咬菜。及居顯職。猶揭舊額。人問其故。重矩曰。吾今富貴。侈心易生。不有此扁。何以自警。及卒家無餘財。時人悼惜。秋八月九日水戶大水。冬十月二十六日。將軍放鷹隅田川。十一月五日放鷹隅田川。十日觀猿樂。十二月十日放鷹隅田川。二十三日以播磨守阿部正能為老中。

二年春二月九日。將軍放鷹隅田川。十一日置脩大內司。十三日命伊豫守松平綱政助脩大內。三月十五日紅毛來聘。二十四日越前少將松平光通卒。



子直堅尚幼。以弟兵部大輔昌親為嗣。夏四月十日京師大水。五月十九日川越民獻玉。二十九日將軍觀猿樂。六月十一日京師大雨。冬十一月三日戶川縫殿助死。無子。沒備中庭瀨二萬二千四百石。十二月六日將軍觀射。二十九日先是前能登守松平定政卒於松山。是日召其子定知。定清。賜定知米一千五百苞。定清五百苞。

三年春正月。後西上皇勅水戶參議獻詩。二月以府下屢火。命捕放火賊。三月朔紅毛來聘。二十二日穿新溝於芝。先是將軍命因幡少將池田光仲備

前少將池田光政鑿溝。皆辭以國用匱乏。將軍讓之屏居。大和守久世廣之曰。兩藩食三國。寧不能鑿一溝耶。然東國諸藩鑿塹。而國諸藩造石壁。祖宗之制也。兩藩辭役不為。無謂兩藩所辭而命之。他諸藩是辱兩藩也。且此役所以恤下。不如令有司為之。將軍從之。遂起役。府下遊士往往蔽面。溷入役夫。將軍聞之。命以夜為之。終夜執役者。賜以三日傭。夏五月三日。若狹前少將阿部忠秋卒。忠秋忠厚篤實。輔政三十餘年。以廉介持身。杜絕請託。會津中將嘗曰。權勢之家。賓客闐溢。古今皆然。惟阿豐州門庭寂

然。吾以此知其賢。大猷公之付託儲君。且矣。又致仕辟穀謝客。國家有大事。執政就而諮詢焉。是日力疾沐浴。遙拜日光山。端坐而終。五日。將軍以忠秋卒不受賀。六月三日。京師大水。初紀伊高船來江戶。遭風漂蕩。至無人嶋。後得便風而還。將軍聞之。將遣人按視其地。命長崎奉行牛籠勝登。令清人在長崎者。造巨船。又募老水手。長崎人嶋谷市左衛門等應之。是夏發伊豆。赴無人嶋。水路難辨。迂回殆千里。始得達嶋。乃巡視地勢。獲珍禽異卉而還。水路既熟。十餘日至伊豆。將軍命畫其物產於屏風。

冬十二月二十四日彦根少將井伊直澄卒以兄直  
滋子直興為嗣直滋直孝首子萬治中薙髮遜世云  
四年春正月十五日紅毛來聘二十九日將軍遣  
使諸國脩堤防二月十九日水戶參議命儒臣悉蓄  
髮編之隊伍自足利氏之衰武人率皆不識字令僧  
徒掌文墨及海內既平儒者承其弊風皆不蓄髮人  
亦以方外之徒待之故林氏累世受知幕府而皆  
任僧官人莫之怪參議嘗曰學道者君臣皆儒也奈  
何以異流待之乃有是命儒者蓄髮始此夏四月三  
日以伊賀守戶田忠昌為京師所司代二十一日京

師大坂大雨水五月二十三日流長崎代官末次茂  
房於隱岐先是茂房家奴潛航海往外國帶刀劍圖  
籍事覺捕而藉其家金寶無算奸賊畢露遂處流慶  
長中豐臣氏以安藝人村上東菴為長崎代官其後  
東菴與末次平藏爭訴平藏曰東菴子信邪教流於  
外國東菴密奪之洋中又嘗贈火藥於大坂東菴坐  
誅平藏補代官至是亡命町年寄攝代官六月二十  
二日封隱岐守新莊直時於常陸麻生初越前守直  
好無子子養從弟直時已而直好生子直矩及卒令  
直時攝國事待直矩年長還國其後直時詐曰直矩

多病不能襲封。或白其實於將軍。將軍命直時還國。無幾直矩暴死。無子。没麻生二萬七千石。時人頗疑直時。然將軍憫新莊氏絕祀。賜直時一萬石。秋八月五日。夫人王氏薨。號高巖院。二十九日。監物水野忠善卒。子忠春嗣。忠善為人好武。繕脩器械。講習兵法。與內記本多政勝中斐守松平輝綱大膳亮青山幸利齊名。時人呼曰四天王。嘗微服往尾張。潛入城偵伺。尾張大納言從城樓望見。將捕之。忠善遽出城。跨駿馬逃還。大納言大怒。潛遣死士夜入岡崎城。取其兵器。棄之城外而還。是秋。越前侍從松平昌親

致仕。養子綱昌嗣。冬十一月三日。將軍放鷹千住。

十五日前。大學頭藤堂高次卒。十二月二十五日。芝

新溝成。二十七日。後。西上。皇宮火。

五年春正月。將軍遣伊勢守上杉長之於京師。弔

災。二月十二日。放鷹隅田川。十五日。紅毛來聘。是春

前。上野介堀田正信潛從。配所逃。赴京師。詣石清水

禱。將軍生世子。夏六月。遣土岐十左衛門於若狹。

驗問。初。將軍命中務少輔堀田安吉。錮正信於信

濃。及安吉徙封播磨。命脩理大夫酒井忠直錮之。若

狹。至是。讓忠直屏居。徙正信於阿波。命阿波守蜂須

賀綱忠錮之。秋七月二十五日，以出羽守大久保忠朝為老中。冬十月五日，以上皇宮成，遣上野介吉良義央於京師賀之。九日上總常陸海澄。二十一日，將軍放鷹隅田川。十二月二十五日，放鷹隅田川。六年春正月二十二日，徙封宮內少輔松平乘久於肥前唐津。加賀守大久保忠朝於下總佐倉。夏六月十五日，東福太后崩。秋八月五日，尾張美濃遠江駿河大水。九月十四日，甲斐參議綱重薨。年三十五。子中將綱豐嗣。冬十月二十九日，將軍放鷹隅田

七年夏四月二十四日，中務少輔木多政長卒。年四十七。養子忠國嗣。政長與出雲守政利素構嫌隙，家臣各相仇者數歲。政長無子，欲養同族。同族不肯，應乃養侍從松平賴元子忠國為嗣。至是，忠國請曰：「臣異姓也。同族內記嘗承襲臣家，臣願讓國於政利。政利亦請曰：「忠國雖異姓，中務既子養之，闔族誰敢侮之。但臣父內記嘗襲本宗，故國家割中務邑三萬石賜臣，臣非不欲辭之。願臣與中務不相能，恐致兩家騷擾，所以濡滯至今。臣願讓三萬石於弟忠英，使

之輔忠國。六月二十日徙封忠國於陸奧福嶋。賜十  
五萬石。復父祖之舊。徙封政利於播磨明石。忠英於  
肉栗本多氏。始相忿鬪。而終以遜讓。一門采地凡三  
十餘萬石。人以為忠勝餘慶。是日徙封日向守松平  
信之於大和郡山。是夏紀伊大水。秋七月十日能登  
守土井利房備中守堀田正俊為老中。十六日畿內  
大水。八月七日伊豫守土屋賴直坐事沒。土總又留  
里二萬石。賜二千石於子達直。於是土屋氏嫡派失  
國矣。十一日將軍觀猿樂。九月六日徙封日向守  
酒井忠能於駿河田中。隱岐守西尾忠成於信濃小

諸冬十二月十一日市正堀包周坐事沒。食邑二萬  
二千石。賜三千石於子主稅。八年春正月十一日增雅樂頭酒井忠清美濃守稻  
葉正則加賀守大久保忠朝封邑。罷忠清連署。二月  
三日紅毛來聘。三月十九日將軍觀猿樂。夏五月  
將軍病篤。酒井忠清建議。援鎌倉故事。欲迎一親王  
於京師為嗣。有司莫敢可否。唯堀田正俊爭之甚力。  
議乃止。執政謀之三藩。水戶參議請立館林參議。  
將軍從之。六日立參議為世子。即日叙從二位。任權  
大納言。八日大將軍薨。年四十。十四日葬。將軍



於寬永寺。號嚴有院。近臣難髮者數十人。六月十一日。天皇遣使贈嚴有公正一位。太政大臣。二十四日設法會於增上寺。令和泉守內藤忠勝等掌其事。二十七日忠勝殺信濃守永井尚長於座。即日賜死。先是設法會於寬永寺。尚長不禮忠勝。忠勝啣之。尋至增上寺。天適雨。執政命忠勝給傘。僧徒甚衆。不能遽辨。尚長嘲毀之。嗣君賜書諸有司。尚長遍示一座。獨不示忠勝。忠勝請覽之。尚長曰。此書不關君事。忠勝大怒。頃之尚長起。忠勝亦起。躡其裾。尚長仆。刃挺。一擊殺之。一坐大驚。擁忠勝幽之別

室。二家從士聞之驚擾。將突入。伊賀守永井直敬諭之曰。鬪爭既息。幕府尋有命。卿等待之衆乃定。嗣君聞之大怒。遂賜死。没志摩鳥羽三萬五千石。以尚長傲慢激變。没丹後宮津七萬五千石。是夏前上野介堀田正信聞將軍薨。悲惋不自勝。作遺書以剪刀斷脰而死。年四十九。秋七月十日。嗣君徙居本丸。二十一日受三藩及諸侯賀。八月十八日甲斐中將任參議。二十三日。天皇遣使拜嗣君為征夷大將軍。叙正二位。任內大臣。閏月三日。將軍令代官曰。民者國之本也。代官務察民疾苦。使無飢

野火纂略卷三終  
一四十一  
寒之患。國豐則民易怠。制之產業。勿令懈惰。凡為長吏者。用心民事。勿專任小吏。堤防橋梁。以時脩之。勿令毀壞。九月九日。封永井尚長弟直圓於大和長柄。賜一萬石。十八日。將軍觀猿樂。二十一日。石見守板倉重通為老中轉內膳正。是月甲斐參議叙正三位。增食邑十萬石。凡三十五萬石。冬十月六日。將軍觀猿樂。二十七日。公子德松住居西城。即日立為世子。先是。將軍議立嗣。水戶參議曰。使故甲斐參議尚在耶。嚴有公必立為嗣。而不幸即世。故立將軍將軍若欲立嗣。宜立今甲斐參議而以德松君

為之嗣。恩義竝行矣。將軍不納。遂立德松。十二月九日。大老酒井忠清罷。是歲封備後守牧野成貞為列侯。賜一萬三千石。成貞右馬允康成孫也。將軍在藩邸。父成儀為之傳。成貞襲二千石。近侍藩邸。擢為老臣。至是封侯。寵眷日厚。

男延年 校

聖祖皇帝

聖祖皇帝

聖祖皇帝

聖祖皇帝

聖祖皇帝

聖祖皇帝

聖祖皇帝

聖祖皇帝

聖祖皇帝

聖祖皇帝

聖祖皇帝

面

七册  
一册